

Hoddiro Alla ina Heewi Sababuuji Tonngoode Dimmere

Abdullaay Mooliido Bah



Konngol Binndudo

Ko ardii fof mido yetta kaando yetteede, mbo njettoor mum gasataa e hunuko bii Aadama, hono Joomiraado, joom baawde e hoddirooji, mido yetta been haanbe yetteede. Been be njettoor mum'en timmataa, so wonaa ñande leli den e paadka peccuka reedu leydi paliika naange, heblaniika jabbaade kala biy Aadama. Been ngoni jinnaabe men, be sabaabu mo'en, woodni goodal men e oo aduna, kaawniido, kulbiniido, keewdo ngoyaaaji di ngaldaa cirol. So duum bennii ko yettude seerenbe men, been be muñal mum'en woodni ganndal men.

Leñol kala e pinal mum.

Pinal noon njeyaa ko e cudaari leñol.

Cudaari noon ko maa topitee, yarnee waasa firde, wolla waasa majjude. Banndiraaabe, hol no topitorto den ndii doo cudaari leñol ñardundi? Mbela ko mbayla ndi nawetee? Alaa ndii doo cudaari jeyaaka e cudaaje naweteede mbayla, ndii doo jeyaa ko e cudaaje jangeteede ndesndee binndol do majjataa maayataa haa abada.

Banndiraaabe teddube, ngaree njanngen demngal men, mbidten ngal, mbinnden ngal, nde keben nafoore maggal.

Paamen been wi'oobe eh jande pulaar alaa ko nafata ko e majjere burnde fof bonde be ngoni, ko e dunduure burnde sukkude, burnde ñanngude e ñaadde be ngoni.

Sabu so neddo wi'i alaa ko demngal mum nafata, doon majjere waawaa doon yawtude. Paamen wonde alaa burbe en pinal, wolla ñeeñal, woodi tan ko be burden, to pinal, ñeeñal, ganndal, jaambareegal, mba'di fof ko e men fuddii, enen Fulbe.

Wadde paamen, eden njogii ko eden paarnoroo haa abadan. E nder ko min teskii noon, min mbi'dti, min tawii ko heewi wayliima e finaa tawaa men. Hol ko saabii duum? Mbela eden nganndi? Yoga e aadaaji men hannde majjii, yeew to duufel, waatara, maabuungel, cuudo cuudongel, gullu, tabbu, woppaama yi'etaake.

E nder galleeji, wori, tengo, gude biiddooji, sukaaɓe yahde e galleeji ina njima ngarda innde cukalel e nder galle ina mbi'a min ngarii doo cellal, miden ngaddi bedi kanje e kaalis, haa kaariyel diwtoo «resa» so ko gorko, so ko debbo be mbi'a haa kaariyel diwtee «resee», dee doo gede fof, hannde ustiima, yoga heen nii mbi'en majjii.

Mbela duum so jukkii leñol waasataa ngal mum e ngalu mum? Banndiraabe tedduɓe, musidɓe renndaabe nguurndam, ngaree celen e wi'de eh alaa ko nafata. Jol-jole dee keewii, ndeenno den hade men jolde do en mbaawaa suutaade mboomo den.

Mido wadi juude am caggal am, ngam ñaagaade yaafuya, sabu won adiibe mi e dee doo golle. Pulaar noon ina heewi wi'de ko gadiido ma e suudu wi'atmaa reeno jaalal.

Ngenndiyan̄kooɓe ɓee ne, ina njidi wullidiibe e wallidiibe, sabu ko kambe ngoni gite leñol. Ko alaa hoore yahataa wolla so yahiine woddoytaa.

Yeewee gumdo alaa do waawi nawde hoore mum, so wonaa do nawaa.

Ndaro den ndokkondiren juude, ɓamten leñol men, yonta am ngummee yeewee dum ko woni e oo aduna, peerten gite men mbela nji'en ko woni jeese men, nanngen e konngol Aadi piɓden wota piirten, yelliten ngal men.

Nanngen e ɓoggol ɓural e ɓamtaare, mbela eden mbaasa boomoyaade, jogii leñol ko pinal mum, so en nanngaani pinal men, hol nanngoowo ngal? So en ɓamtaani ko'e men hay gooto ɓamtataa en.

Paamen hay gooto arataa ina ɓamta demngal men e pinal men so wonaa enen, yoo leñol ngol jaran en pittaali men, jawdeele men e kala nokku men,

Teddungal am kuub̄tindinngal fa'de e ɓeen ngenndiyan̄kooɓe leñol, yoga e maɓɓe noon cuddiima leppi leydi, kono golle maɓɓe tedduɗe, joodɗe, hareeji maɓɓe ngam ɓamtaare leñol maa njahdu e njuuteendi aduna haa abadan, ko wa'ino Yero

Dooro Jallo, Tijjaan Aan, Aamadu Ham-Paate Bah, Teen Yusuf'en hono mum'en ina keewi limotaako, kono alay sago njubben e golle maɓɓe paayondinde de ɓe ngollani leñol ngol.

Nde wonnoo leñol jaraniino ɓe huunde fof, haɓeede, haɓɓeede e wareede, leepteede leepte cattude, kono fof hadaano ɓe haɓtaade, haa aduna kala seedtii darnde maɓɓe. E ɓeen ngenndiyaŋkoobe dariiɓe e koyde mum'en haa e ñallunge, ko wa'ino Bah Sammba Pulal, Jallo Sammba Koliyaajo, Bah Basiiru, Aamadu Tijjaan, oon mawniraado tedduɗo gido denndaado nguurndam e ngoɣaaji aduna, hono Hamma Kan e mawniraaɓe mum Aamadu Kan e miñiraaɓe mum wondude e suddiiɓe e ɓesngu maɓɓe kala hay gooto en njejitaani too e Kaay Mali ɗo wi'etee leegal segu. Bah Cebaa Mammadu, Saane Aamadu Kode, Jaawo Yero Bala too e leydi Pari oɗon teddiniraa ndee ɗoo deftere Jallo Moodi Bilaali.

En njejitaani ɗoo ONG-FANNDEEMA e gardagol POOL Bammba Keytaa e wondiiɓe makko kala. AKKADEMI e hebloobe mum hono IBIRAAHIIMA Saŋkaree e Fanta Njaay, golle maɓɓe paayondinɓe e darnde maɓɓe e demɗe ngenndiije, Kordinateer STOP SAHEL hono Konnaate e Abdullaay Saŋkaree, Jallo Sawadi ENNDA Mali denndaangal daraniibɓe ɓamtaare demɗe ngenndiije ina teddiniraa ndee ɗoo deftere Tonngoode Dimmere Hoddiro Alla Ina Heewi Sababuuji.

Didfal Jaalal Gelluwaar e gardagol Bah Demmba Faakuru, Sow Yero Aamadu, Saane Sammba Demmba, Bah Silaa Yaagel, Bah Demmba Dadal, Gaajigo Demmba Maalaw labbo labiido pulaar, Baa-Siidi en njejitaani.

Mi yejitaani been ɓe ndenndu mi meccal dimal keewngal nafoore woni janngingol, Hono Bah Demmba Morel, Bah Umaar Aali, Gorel sow, Yaayaa Silla, Suufi Silla, Yero Tarawore, Sammba Kulibali, Ndommo Jallo, Yaay Jallo, Faati Jallo, Ñaaru Siisoko, Aliw Gannge, Aadama Tarawore, Waali sii, Sow Abdullaay Baydi e kala ngenndiyanke, eden dum ñaagii ballal, en njawaaki hay gooto, en paltaaki hay gooto so wonaa paltiido hoore mum, hay oon enen eden mbattorii dum, yoo wuur yellitoo demngal Pulaar.

Jokkugol Koorka Janɗe

Ndeen ñawndale dee peewnaama, Koorka heɓii ɗe wodii e ɓanndu, jooni kay ko ronkanoo dañaaɓa so cellal Koorka. Jooni kay Koorka sellii, o dañi ko o sikkaano, so sellude. Pulaar wi' dañde ko sikkaano, ɓuri sikkude ko dañataa. Ndeen woni kadi nde o wi' jinnaaɓe makko, omo yidi ɓamtude janɗe makko, been ne mbi'mo baasi fof alaa e duum.

Nii woni Koorka yahi jokkoyi janɗe makko haa o heɓi seedanfaagu makko. Koorka woni e ndaartude golle. E nder ndaartugol makko golle, o nani won eɓɓoore hesre ari e oon diiwaan ina ndaarta gollooɓe. Ina woodi noon kaayitaaji ɗi eɓɓoore ndee naamnii, tee eɗi tawee e kaayitaaji makko kanɗo Koorka.

Tee kadi golle ɗee newaaki, nde wonnoo eɓɓoore ndee boniraama golle laabi keewɗi, sabu gollatnooɓe heen ɓee timminaano darnde maɓɓe.

Ndeen Koorka nanii oodoo kabaaru, o felliti ndaartude golle ɗee, tee omo joginoo to galle maɓɓe too fodde ujunnaaje ujunnaaje yimɓe ɓe hakkillaaji mum'en mbeñinoo sabu baasal e tampere.

Koorka ina waɗi ɓe toon e nder dingiral jaajngal mahangal haa toowi ina hurlitinaa, ñaamdu maɓɓe, yardu maɓɓe, gede maɓɓe fof ko toon tawata ɓe, tee ɗuum ko huunde nanngunoonde yimɓe kaawis, Koorka ina toon waɗi golloowo laaɓɗo ɓernde baawɗo fuuntude, omo wondi e maɓɓe toon.

Kono jooni kay heen heewɓe keɓtii hakkillaaji mum'en mbaɗtii nii wallude golloowo gondo toon oo e yuɓɓinde ñaamdu e yardu heddiibe ɓee.

Wadi subaka gooto ari e bernde Koorka, yoo yah hedde to tagoore ndee rokkunoo dum ñawndal too, o yirloyoo toon.

Ndeen Koorka yahii haa wodfoyii no feewi, miiyii yoo o yah kadi o joodoo, do tagoore ndee rokkunoo mo ñawndagal doo o ñaagoo doon Alla ballal e kala ko ina bamta dum nawra golle makko dee yeeso, omo e ngoo miiyo haa o yottii bogge didi dee, o hebi les majje o joodii, haa booyi henndu welndu ari e makko, o felliti e bernde makko kadi ko tagoore ndee arata e makko.

Jiidugol Koorka E Tagoore Ndee

Ndeen yahii haa wadii dumunna tagoore ndee feeñani mo e mba'di aadee, nde ari haa yottii Koorka nde salmini Koorka, Koorka salmitii, tagoore hebtii e wi'de ko miin woni gido maa hannde e janngo, ko miin woni ceerno maada e aduna, a anndaano dum, kono maami anndine dum hannde, tee maa mi rokke heen daliilaaji laaftudi.

Tagoore ndee hebitii wi' Koorka wonaa ñawmaa oo heɓmaa ko to njanngoyno daa.

Koorka wi' eey kay, nde jokki e wi'de mbela wondo heddii e duunde baaba aadama do a nawaaka? Koorka wi' oon nokku alaa?

Mbelaa wonaa ko miin rokku maa safaara? Koorka wi' eey, nde wi' kadi mbela baaba maa wonaa ceernaajo jogiido gannde haa nanndi e waliw? Koorka wi' ko goonga.

Tagoore ndee ina haala Koorka ina beydoo haaweede, haa nde joofni.

Nde hebitii nde wi', Koorka mbela ko kaal mi koo fof wonaa goonga.

Koorka hebitii wi' fof ko noon woori, doon tagoore ndee hebitii wi' Koorka jooni maa mi hokke ko ada reentoroo.

Sabu aduna ina heewi yiddeeji e ngoy'aaji, mido rokku maa doo gede didi njogo daa de, kala ko waawi wonde sokla maa e aduna so a woogondiriide maa mi ar e maa ko buri yaawde, Koorka hebitii wi' mi nanii tee maa dum wel am.

Sirlu Hakkunde Tagoore ndee E Koorka

Tagoore ndee itti ñaayre wa'nde no settiraande lamset gila ina heccidi, ende jalba e haayre wodnde murlere raneere, ende wadi mba'di purdi, nde totti Koorka, nde wi' kala nde haaju maa darii e am fof so a woogindirii de, maa mi ar e maa ko buri yaawde, nde rokki Koorka doon tagoore ndee majji e majjal yitere.

Ndeen Koorka hebii dum, fa'ti wuro, nde yahnoo haa o yottii o naati suudu makko o moftoyi do hay gooto waawaa yi'de so wonaa kanke tan e Alla, o yalti o bami deftrere mawnde o woni e janngude.

Nde yahnoo haa hitaande ndee jogori timmude ebe kaani wadde kawgel, Koorka arti kikiide gooto, ngam haalande golloowo makko oo, kanke noon won ebbore hesre ari doo, omo yidi jikkondirde e mabbe so Alla newnii, oon ne wi' dum baasi fof alaa banje keetnudaami oo kay wota jogo heen sikitaare, ngon daa doo a alaa doo fof foti.

Ko heddii koo yoo Alla won ballo, ndeen oon gaynii haalde Koorka weltii e jaabawol nani ngol, nde yahnoo haa booyi bernde makko addi yoo o yeewndo ko tagoore ndee wi'noo mo koo, doon tan o naati suudu makko o yaltinoyi ko tagoore ndee rokkunoomo koo, o fa'i ladde.

Koorka yahi haa o woddoyi, o joodii doon e les lekki mawki ina wi'ee cilluki, o yetti ko tagoore ndee rokkunoo mo koo o woogindiri de. Do Koorka joodii doo tan haa Tagoore ndee ari e mum. Koorka haalani nde sokla mum, nde wii dum feewi Alla jabii.

Nde yahnoo haa jamma Koorka noddii jinnaabe makko, o haalani be wonde won ebbore ari doo ina ndaarta golle, omo yidi jikkondirde e mabbe, sabu kaayitaaji be naamnii dui

omo jogii di, Koorka hebitii e wi'de jinnaabe makko, paamon noon mi yidaa wadde ko on njamiraani.

Ndeen Koorka joofnii haala mum, Ceerno Sekko dirmii yetti Alla juuli e nulaado makko tedduo, o wi' duum kay alaa baasi, ina moyyi, sabu ko ko min ñaagino den Alla, ñaagaade Alla noon tiidaani, tiidi ko Alla jabde ko ñaagidaa dum koo.

Ceerno Sekko deyfi ko juuti, ngam miijaade mo no ñawu nguu tampinirnoo Koorka, haa yimbe fof damtindii nguurndam makko.

Ndeen Ceerno Sekko hebitii wi' Takko a nanii ko biya haali. Neene Takko dimmbi hoore, sabu bernde mum ina heewnnoo njurum, o woniri noon ko juuti, omo nati tonndu makko les, Neene Takko hebitii wi', mido caggal Alla, mido caggal maada, kala ko mbi' daa heen ko noon wadirtee. Doon Ceerno Sekko wi' Koorka jooni so weetii, ada waawi yahde nji'doyaa e mawdo mabbe.

Koorka hebitii wi' «Baaba hono dee golle, ko bataake winndetee nawee toon, so Alla jabii subaka maa mi winndu bataake fa'de e mawdo mabbe oo.

Koorka waaldi e miijooji hol fof no dum wonirta? Mbela maa be nja6 ñaagunde makko? Wolla maa be calo ñaagunde makko? Kono kay subaka fenataa. Ndeen weetii subaka,

Koorka winndi bataake daɓɓaande fa'de e mawdo maɓɓe oo, Ceerno Sekko e Neene Takko keɓɓitii mbi' yoo Alla newnu, Koorka heɓitii wi' aamiin.

Nde yahnoo haa subaka janngo mum, Koorka fini noddii sehel makko debbo oo, Koorka wi' mbo gidɔ, miin ko e laartude golle ngonmi, won eɓoore hesre arnde doo ina ndaarta gollooɓe, mi anndaa so a nanii haala mayre ina haalee.

Sehel makko oo ina ndaara dum tan, ina yirla hoore e miijaade mo ñande o tawata Koorka to suudu safrordu too wuuraani maayaani, tee doon so o ñaafiino hunuko tan e wi'de eey, o woyat, Koorka ne tinii, wonde won ko bernde sehel makko ndee awata, tan Koorka deyɣiri noon, o yalti fa'ti galle maɓɓe.

Koorka yottii naati suudu Neene Takko lelii, haa ɓooyi, o yetti deftere makko o woni e winndude.

Bataake Fa'de E Hooreejo Eɓɓoore Golle.

Fa'de e oon hooreejo tedduɗo

Hooreejo tedduɗo mido ara e sara maa, ngam laartude golle e juude maada.

E neddaagal maada timmungal, mido laardu maa, golle de naamni daa dee, sabu mido waawi timminde e gollude ko mbi'daa koo. Mido felliti gollude kala ko mbi'daa no haaniri.

Tinno mido ñaagimaa nde njabantaami ndee doo ñaagunde.
Hooreejo teddudo jobbo calmaali am burdi teddude e
teenjude fa'de e maada.

Nii woni Koorka winndi bataake mum haa gasi, fini subaka
nawi mbo toon joyɣini mbo do kebotodo batakui doo, o
arti galle.

Ndeen hooreejo oo hebi bataake Koorka, o janngii mbo, o
faamii loowdi makko e ko o yidi wi'de fof, hooreejo oo
faamii, Hooreejo oo wadi e Koorka nelal wonde yoo ar toon.

Garal Koorka To Suudu Gollirdu

Ndeen Koorka hebi jaawol wonde yoo ar.
Koorka noddii Ceerno Sekko e Neene Takko, o wi'be mi hebi
jaawol ummoraade e hooreejo golle dee, o wi' wonde yoo mi
ar toon min nji'da, Ceerno Sekko e Neene Takko mbi' yoo
Alla wad newuya.

Ndee weetii subaka, Koorka dawani toon ngam yi'doyde e
maabe, Koorka ari haa faandii nokku oo, o yi' ina winndaa
doon on ngarii e jam e nokku eboore riiwtoore
humambinnaagu e haabaade baasal.

Koorka anndi ko doo woni nokku oo, o ari haa do damal doo,
o tawi gorko gooto ina joodii doon, Koorka naamnii mo e
wi'de ko doo woni nokku eboore hesre arnde doo ko

booyaani ina ndarta golloobe? Oon jaabii wi' eey ko doo kay.

Koorka hebitii wi' miin dey ko hooreejo nokku oo neli wonde yoo mi ar gaay, gorko oo hebitii wi' ar njahen, oon ardii Koorka rewi heen haa njottii do mawdo oo woni doo, gorko oo honngi baafal, be naati, be tawi mawdo oo ina jiimi masin ngaandiijo ina winnda, Koorka salmini, o salmitii, nii woni be calmondiri haa sadi joofi.

Ndeen woni nde Koorka wi' ko miin wi'etee Koorka, binndunoodo on bataake ñaagunde golle, haa njaabti don wonde yo'mi ar, jooni mi arii. Mawdo oo hebitii wi' a bismaama, ko ndeen mawdo oo haalani Koorka ko golle dee naamnii, gila e mbaawka, muñal, tampere haa e ko nanndi heen.

Ndeen o joofnii haala makko, Koorka wi' kala no golle dee mbaawi sattirde, heewde tampere, mido yarlitii, tee paamaa wonaa mido fuddoo hannde mi acca jango, ko mbi'maami koo wota jogo heen sikke, ko mi pellitdo. «Pulaar noon wi' pellitdo aanaani.

Ndeen woni nde Koorka fuddii golle. Yimbe wonnoobe doon e suudu gollirdu nduu fof haa e saraaji mum fof ina koolii Koorka e golle mum, tee e kala sahaa Koorka ina rokkatnoobe wasiyaaji laabtudi.

Duum nii ina jeyanoo e ko beydunoo hoolaare maɓɓe e Koorka, sabu yananeede ɓe so neddo yidaama yidanaama jam wattataama e laawol, ndeka noon ɓe paamii wonde ɓe keɓii gido mbo suudaani yidde mum e gilli mum.«Pulaar noon wi' so yidde suudaama anndu nde timmaani, ruttii kadi wi' gilli ngonaa naafige.»

Heddii kala do Koorka yi' ko feewaani feewnita, kala ko jiiɓoriibe e golle hee, ko maa ɓe njottoo Koorka ɓe kollita dum, tee kala ko Koorka haɗnoo, so wadaama feewataa, ko doo kamɓe fof, ɓe pelliti, ɓe ndokki Koorka hoore, mawɗo oo e hoore mum, jaɓani Koorka e darnde mum, e lewru go'aɓuru nde ndu maayi, Koorka soodi njawdi mawndi ngam wadde sadak.

Koorka wadi sadak

E ñalawma jeedaɓiiɗo e nder lewru makko diɗaɓiiru, ina hawri e alkamisa, Koorka wadi sadak, o noddi gollidiiɓe makko e denndaangal yimɓe wuro ngo, hay gooto o faltaaki, yimɓe notitii e keewal, mawɓe ina mooyta bahe ina njetta Alla, sukaaɓe e luukaali mum'en ina ndiwa ina cirpoo ko gasataa.

Ndeen yimɓe fof ñaamii haa kaarii ndu'iima kootii galleeji mum'en, Ceerno Sekko e kurusal makko nana tappa jabe e ñaagaade Alla ko gasataa, Neene Takko ina nder suudu mum ina du'anoo ɓiyum, ina yetta Alla sabu ko sikkanooka dañaa

woni doo.«Pulaar noon wi' dañde ko sikkaano, ɓuri sikkude ko dañataa.»

Nde wonnoo Koorka ko mum koo ko dokke Alla. «Pulaar ina e konngol e wi'de mbo Alla rokki ina haani wasaade, ruttii kadi wi' so Alla rokkiima teettoowo woodaani, tee alaa ko haasidi waawi e dokke Alla.»

Cafrugol Hakkillaaji mbeñiidi

Toon to galle maɓɓe too Koorka ina moofti toon fodde ujunnaaje-ujunnaaji yimɓe ɓe hakkillaaji mo'en mbeñii, ko toon ɓe ñaamata, njarata, gedde maɓɓe fof ko toon tawataɓe, tee yoga e maɓɓe puɗiima heɓtude hakkillaaji mo'en. Hono noon yimɓe ɓee fof, ina njetta Koorka e dee golle makko e ndee darnde makko.

Ñande wootere noon Koorka ina dawɗi ina fa'i gollirdu, tan haa ɓe tawi suka gorko, ina doon lappii e dow laawol hee, ɓanndu makko ina wonti gaañande-gaañande, alaa fof do junngo waawi memde e makko, tee o wuuraani o maayaani, omona do hakkunde doo toskoo, kadi alaa fof ko wadi mo noon so wonaa njaram mbondam. «Pulaar noon wi' so yidde heccii dañal jibinta nimsa.»

Nii woni nde Koorka yi'noo mo tan, wi' yoo dognoowo werlaa oo darto, oon ne ko doon yaɓɓi e njamndi werlaa oo darii, Koorka tellii ari jiimi e makko, ɓernde makko boni njurum

suka oo jaggi mo, Koorka nati tonndu makko les ngam hadde gondi makko yande, kono o ronki, sabu ko o kecco bernde. Ko doon Koorka wi' yoo be naw mo suudu safrordu ko buri yaawde, o wollondiri e dognoowo werlaa makko oo, be njolni mo nder werlaa, be nawi mo suudu safrirdu ko leelaani.

Ndeen be njottiima Doktoreebe bee mboddi e suka hee adaa, sabu ko o tampudo haa wonaa seeda, be yetti mo be naatni mo e suudu irsaas woni do tampube mbadetee doo, be lelani mo doon e balngel be cengi e makko boggi pooreeji daneeji be ngoni e yeewde ko woni ñawu makko, haa do be kempinoynoo.

Be mbaklitii e Koorka, ngam naamnaade mo, ko saabi ebe ngaccira nii neddo mabbe haa ko ñawu nguu ina heya e makko ko fotinii tawa be njottaaki suudu safrordu?

Doon Koorka jaabii nde wi', miin mi anndaa mo, mi anndaa to jeyaa, mi anndaa koreeji makko, tee hay innde makko mi anndaa, ko nde ndawatmi ndee e subaka hee, ngarmi haa kawral laabi pali, tawmi omo larpai doon o wuuraani o maayaani, mbi'mi yoo dognoo werlaa am oo daro min yeewa ko hebi oo leliido, kisa min tawi omo wuuri.

Mbi' moo mi yoo min ngaddu mo gaay, mbela so balde makko ina yeeso o daña safraade, kono wonaa wonde mido anndi mbo, doon tan yeeso Koorka hawii holliri njurum gondi

makko, ngondi e simtude, doktor oo ina ndaara Koorka tan ina ndaara ñawdo o, doktor oo e hoore njurum jaggi mo haa wonaa seeda.

Ndeen Koorka gaynii haalde doktor oo ne Alla e njurum, o haalaani hay konngol gootol, doon tan o naatti doon e nder suudu wodndu o artiri baafal karaɓ.

Doktor oo woni toon ko buri juutde, o yalti, omo jogii dereeji daneejo, wiro, cañe e ngedoñ kodkoñ ko sifaa waawaa labbinde, ndeen o naatii to suka oo woni too, be cengi e makko boggi ngam yeewde tolno nguli banndu makko.

Caggal duum be pesi mo «pinngi mo» ngam o waawa daanaade. Koorka nana joodii hiimo–hiimo e taɣam beram ina njaptondira e fittaandu mum, omo miiɗoo dii mbeddaaji e bee yimbe be mbaawaa dognirde seese a wi'at ko looci ndewi caggal maɓbe ina cutta.

Koorka ina e deyyere mum, haa doktor yalti ina jogii derewol balewol ina e maggol natal aadee jurminiingal, o yaaɓani Koorka e wi'de min mbadii neddo maada e rajo ngam etaade anndude ko ñawni, derewol ngol nani kono jaabawuuji yiiɣam dii ciwaa yaltude alaa ko min mbaawmaa heen wi'de so wonaa di ngar.

Koorka hebbii derewol ngol, kono bernde makko ina taʼa haa wonaa seeda, sabu o alaa miiɗo so wonaa oo neddo mbo addi ko kawroowo e lajal sikke alaa heen.

Doon Koorka muɓɓi gite woni e ñaagaade Alla cellal oo doo ñawdo, ndee doo ñaagunde Alla tiidnde, jokki balde oo doo suka.

Jaabawuuji yiiʼam e ko di ngartiri

Nii woni jaabawuuji dii ngarti kono di ngaddaani ko wadi baasi. Doktoor oo winndani Koorka ledde de o haani soodde ko yaawi, cellal suka bura newaade. Ndeen o yahii o soodoyii ledde dee o arti o rokki de Doktoor oo, Doktoor oo holli Koorka no de bamiirtee, Koorka woni e wadirde de no Doktoor oo wi'ri nii.

Hono noon ñawdo makko ina hefta cellal seeda seeda, o wadti haalde, o wadti ñaamde no haaniri nii, o wadti daanaade, hono noon haa o woni celludo.

Yeewtere Hakkunde Koorka e Ñawdo mum

Ndeen Koorka hebbii laaɓndi wonde suka oo sellii, Koorka noddii mo nder suudu, ngam naamnaade mo to jeyaa, hol no jinnaabe makko mbi'etee? Koorka hebitii wi' aan nde wonnoo kawru den ko e punndi mi anndaama, mi anndaa to ummi daa, mi anndaa jinnaabe maada, jooni noon ko duum

njidmi anndude, hol no mbi'etedaa? To jeyedaa? Hol be ngoni jinnaabe maada?

Suka oo hebitii wi' mido wi'ee Hoddaandu njeyaami ko wuro ina bogge puneeje.

Ko sukaaabe njeetato min ngonnoo e nder galle baaba amen, jooni noon heen tato Alla fawi e maɓɓe haajaande mum, min keddii njoyo, minen njoyo heddiibe bee ko miin burnoobe welde yiiyam banjeeji dii fof, ko miin wonnoo joom innde, ko duum saabi so be mbadi dee doo golle bonde, nguurtaami tan ko e gede nuskooje aadee, suka oo ina haala Koorka ina ndaara mo bernde mum ina wi' dak njurum, hay haalde Koorka ronki.

Nurum Hakkunde Koorka e Ñawdo mum

Ndeen suka oo gaynii haalde, o turi hoore, o woni e nyaafde leydi, Koorka ne na nati tonndu mum les haa tiidi ngam hadde gondi mum yande, o ummorii noon o fa'i boowal omo dinwa kar-kar Alla e njurum. Nde yahnoo haa booyi Koorka naatti suudu mum, bami doon deftere mawnde ngam janngude ina winndaa e njarro mayre Foddeeji e hakkeeji banii aadee, o jiimi e mayre omo jannga.

Njillu Koorka To Leydi Tagooje Kaawniide

Ko doon kadi bernde makko hokki yoo yaltu o yaha, sabu golle dee nattii wadde ngartam, o felliti yahde to buri

wodɗude, ngam heɓde toon golle, kono Koorka faamaani wonde ko tagoore ndee woni e waylude miijo makko, ngam nawde mo to tagooje dee kodi too, ndeen Koorka woni e dii doo miijooji haa juutii, Koorka ummii saligii juuli darɗe dɗi, o lelii, o yi'i e miijo makko gede kaawniide.

Koorka yi' Tagoore wootere ende wadi ko'e jeedidi juude sappo e dɗi, koyɗe capande tati fof ina senii e Tagoore waɗnde coɓɓuli nayi ende yirloo do wootere ko aldaa e dartaade.

Dum haawi Koorka, kono o jokki laawol makko. Koorka ɓenni haa wodɗi kadi yi'i kullel ladde bayloyel mba'di ɓanndu maggel e kala goobu, o ndaari ngel, haa ɓooyi o yetti Alla o juuli nulaado makko.

Koorka jokki laawol mum, o yi' kadi weendu mawndu heewndu ndiyam, ina reeni ndu bolle ɓutte ɓaleeje. Koorka yawti kadi o yi' kadi weendu wodɗu, mawndu heewndu ndiyam, lekɗe biltude ina njibini haa ndaasii e leydi a wi'at nii ndu alaa lekki njoorki, fof dey kala ko Koorka yi' heen kaawis jaggat dum haa hortoo anndude ko yahata e dow mum.

O yi' kadi njawdi mawndi, o sikki ko majjundi, o yidi jaggude ndi, kono nde Koorka ɓadii njawdi ndii, ndi wonti ngaari mawndi kawoori, gallaadi mayri ina njuuti, endi seeɓi, kala

do allaadu mayri yani sikke alaa wadat aanode, ngaari ndii naati e wuro, moni fof yeewi do danndoyi fittaandu mum, ndi huciti e makko ndi yidi hawde mo, kono yimbe palii ndi, ngam fellude ndi, yimbe ina pella ndi, ndi dogi ndi fa'i ladde, ndeen ndi naatii doon e dunduure sukkunde, ndi wonti fasamere jayngol dum wonti cumu burngu fof heewde doole.

Cumu nguu ina hulbininoo, sabu hay gooto suusaano badaade ngu, saka miiyoo ñippude ngu. E nder dumunna daɓɓo tawi fof wontii ndoondi.

Koorka haawaa noon, hol no yimbe bee ndadiri e oo bone kulbiniiɗo kaawniiɗo, garduɗo firtude kala ko feewnoo, Koorka jokki laawol makko fodde balde capande jowi o fooftaaki, jamma e ñalawma ko o jahoowo o daraaki, haa o aroyi e nokkuure haawniinde yaajnde heewnde goobuuji, waylotoonde e kala mbaadi.

Jottagol Koorka e Nokkuure Ngalu

Ndeen Koorka yottiima doon e nokku, kaawnii do kadi nokku oo ina yaaji, ina weli wonde, sabu nde Koorka yottii doon ndee a wi'at ko guttaado nguurndam kesam, wonki makko weeytii, kanke hoore makko, o anndi maa wood ko kewani mo, sabu nii no o wa'l, won ko hollata.

Tan haa sawtaango ardi mo e nder kaawniindi dow weeyo ina wi'a mbo, hol to njahataa? Hol ko yeewataa? Ko doo woni

hodorde Tagooje ladde dee kala, sawtaango ngoo wi'mbo wota sostu do ngon daa doo, tawa a haalaani ko addumaa, doon tan sawtaango ngoo arti dey'yi, alaa fof do Koorka nani dillere, hay henndu mooyaani, dum wi' tan cel.

Koorka weddii ndaarki mum haa o yi' ngaska ina fa'i nder leydi, o naati e makka, Koorka tawi toon kadi wero daatngo yaajngo ngo goobuuji keewdi, Koorka tawi toon kadi Tagoore, ende wadi ko'e sappo e didi, juude jeedidi, koyde capande tati ende yirloo ko aldaa e dartaade, ende wayloo e kala goobu.

Ndeen Koorka faami wonde o yottiima hodorde tagooje dee. Doon kadi sawtaango ardi mo e nder mbirniindi engo wi'a mo ko miin woni joom nokkuure ndee, ko miin woni joom kaawisaaji.

Hol ko njid daa? Hol to njahataa? Hol ko woni ngo'ya maada? Aan bidngel Aadama.

Doon kadi Tagoore ndee hebitii wi', maa mi rokke geloodi tati dimndaadi kanje dimo. Koorka e kulol mum ina dinwa kar-kar, Koorka darii ko buri juutde dillaani, a wi'at ko joordo do woni doo, gootol hunuko makko boccitiimo e wi'de mido yidi ñaagaade ma yaafuya, aan kaaloowo e der mbirniindi, kadi mi sujja e yeeso maada, ngam rokkude ma nehdi, gila ummiimi e ngal doo danngal, ina wa'i no boggi

mbadaa e kine am ina poodee fa'de gaay, haa njottiimi doo e baawde Alla.

Kono kadi paamaa won kaawisaaji, di nji'mi e laawol mido yidi ñaagaade ma, aan joom nokkuure so won ko kumpiti daa heen yoo a firtanam ko di ngoni, sabu mido yananaa ko e njiimaandi maa di ngoni, sabu ko ganndal e laaɓal mbaawi moftude ngaluuji e kaawisaaji poddi nii heewde.

Doon Tagoore ndee hebitii wi' Koorka gollir laaɓal, oo kanje ndokkatmaa mi, kala ko njidɗaa e aduna, maa a heɓ, paamaa ko mbo ñawndagal.

Senaare e laaɓal woodanii Alla bajjo geno gooto, mbo alaa nanndoore.

Do ndee tagoore joodii doo ko-ko yirlotoo daraaki, ina tammbii nde koyde nayi, tee heen koyngal fof won ko hollata.

Yeew heen koyngal gootal ina holla henndu mawndu, koyngal dimmal ngal ina holla yerɓugol leydi, koyngal tataɓal ngal ina holla ndiyam pusam, koyngal nayaɓal ngal ina holla cumu mbonngu ngu ñippotaako.

Koorka ina sokti terde mum fof ina ndaara ndee Tagoore ina hedtii ko nde haalata koo, Koorka ina huli haa wonaa seeda,

tee kala ko o yi'noo e laawol, o tawii dum do ndee Tagoore woni doo, nokkuure ndee ina yoodi haa haawnii.

Doon hanƙadi, Koorka felliti naamnaade, kala ko yi'noo e ngol laawol e kaawniide, ngam anndude hol nafoore wolla firooji wolla sirluuji mum? Ndeen geloodi dii ngaddaama, Tagoore ndee yamiri yoo ngeloodi didi beyde heen, tawa diin ne ko kanje dimo di ndimndi, wadira a hono no Tagoore ndee wi'ri nii.

Tagoore ndee wi' Koorka maa mi wadde e reenooƙe haa njalƙaa ndii leydi amen, tawa hay huunde hebaani ma, tawa kadi ko e nder ngaska kootirtaa, kono bernde Koorka ina yeditii, sabu o siwaa heɓde laaɓndi e ko o yi' koo e laawol.

Doon Koorka sujji hucciti e Tagoore ndee, Koorka wi' yaa aan ceerno joom gannde e kaawisaaji, joom ngaluuji, mido ñaagomaa yaafuya, ko mi banii Aadee, njid mi ko laaɓeede hade am yahdude e kumpa, wonanoyami nimsa, njid mi ko naamnaade ma kaawniide de nji' mi e laawol dee, mi faamanade huunde.

Tagoore ndee heɓitii wi' Koorka naamno kala ko woni sokla maada e yidde maada, maa mi itte kumpa. Koorka heɓitii wi' mi ariino e wuro wooto njid mi fooftade doon, kono yimbe wuro ngoo mbi'kam, kodo alaa e maggo jippunde, yoo mi ɓennu.

Mido yalta wuro ngoo, haa nji'mi gorel daɓɓel perlel ina rewi e am, ina luuka ina wi'a mbi'adaa ko yoo a yah les deya bogge gonde fudnaange wuro poofto daa toon, ko toon woni jippunde hofɓe, bogge dee ko tati, darnde majje wa'i kono kaay'e kaatane nii, ede mbilti haa de ngubii, a yi'ataa e majje sereendu, doon ngel gorel majjiri mi e majal yitere.

Doon tan minne pa'mi e majje, nde njottiimi de ndee leliimi nde wonnoo ko mi tampudo, kooyinii mi hay asamaan oo ndonkumi yi'de alla e majje sukkude, do leliimi doo, mi tinaani haa doyingol wi' kam cas daaniimi.

Findinoyimi ko nguleeki naange kaadki rok, taw mi bokki cakkino mi kii yoorii kon, kaawaa mi costu mi e les ngodki kono doon kam ndonku mi daanaade, sabu ngonnoo mi ko e hedtaade daade colli cirkooji ko aldaa e tayondiral.

Haa nji'mi to dow bokki too ko wa'ino aadee ina joodii e dow mbarallu ina yirloo e cenɗe Alla nayi dee kala, ko aldaa e dartaade, nji'ki makko ina hucciti fudnaange ellee ndaaroowo huunde jogornde feeɗe wolla hoodere jogornde yaltude e weeyo, haa booyi, ngel dartii kak, alaa fof do dillatnoo e terde maggel, wonaa mbarallu do ngel joodii doo, paammi kadi dum jeyaa ko e kaawisaaji maada.

Nii woni noon baditiimi gorel ngel e nehtaare, ngam salminde ngel, Koorka hebitii wi' mbi'mi ngel, jam waali baaba, kono a wi'at ko ngel pahel, sabu ngel jaabaaki, doon

kadi kesditiɓi salmiɓaango am e maggel, mbi'mi ngel jam waali baaba, ɓuraani bonde so wonaa ndeen, kadi ngel jaabaaki, noon fof e wa'de haɗaani mido jokki e salminde ngel gorel, ngel ngannduɗaa feccere e maggel ko aadee feccere heddiinde ndee ko baajol leydi.

Doon kadi ɓernde ɓami mi e miijaade, yoo taw wonaa jogorɗo haangeede, sabu mido haalda e ndee Tagoore kono nde jaabaaki, fof dey haɗaani mido jokki e haaldude e mayre, kono nde wonnoo ko e hoddiro Koorka yahata haɗaani mo jukkude e golle mum, Koorka ɓeydii ɓadditaade ngel, ngam laaɓtindaade ngel, Koorka tawi hoore maggel ina waɗi jombo mbaal mbaal e kuru juru, piindi lekɗe ina saɓii e sukundu maggel.

Tiinde maggel, ɓuri terɗe maggel keddiɗe ɗee mawnude e juutde, kadi ɓanɗe maggel nano oo, ɓuri ɓanɗe maggel ñaamo oo wuurde e mawnude, gite maggel ko lette, heen wootere ko dow tan nde ndaarata, woɗnde ndee ko les tan nde ndaarata, kadi ngel alaa mba'di ngootiri, ina janngoo e mba'di maggel sunaare e weltaare e baawɗe Alla.

Ndeen ngel ɓamtii gite, ngel ndaari kam, doon ngel salmitii, ngel salmini salmiɓaango ganndo, heddi haɓkadi ngon mi najɗo, sabu mi ɓooyii salminde ngel gorel, ngel jaabaaki, jooni engel salmiɓaango ganndo.

‘Doon kadi nanmi reedu maggel ina hooy’a, cikkumi ko heege ngel wondi. ‘Doon kadi mbi’mi ngel, baaba mido ñaagimaa nde njabantaa mi, daccaa mi yeewanmaa ko ñaamdaa, sabu reedu maa ina hooy’a heege. Gila hanjki eden ngondi mi yi’aani ada ñaama, ndah dii doo buudi kanje coodaa ko ñaam daa, kadi ada waawi soodde heen comci koltiraa.

‘Doon gorel ngel jaɓi dokkal Koorka wondude e weltaare, sabu alaa ko ngel meedi waɗande Koorka e moyƴere ko ɓe nji’di koo. ‘Doon tan gorel heɓitii kadi wi’ Koorka nganndaa mi wonaa aadee saka mido ñaama, kono a jaaraama, sabu a suuri terɗe am, yoo Alla suure e bone añaɓe bonnooɓe, doon ndañ mi cuusal ɓeydiimi ɓadaade gorel ngel e wi’de baaba mido yidi ñaagaade ma yaafuya, sabu won ko njid mi naamnaade ma.

Gorel ngel heɓitii wi’ Koorka yoo jam Alla e kisal mum ngon e men, mi yamiriima naamnaade kala ko nji’ɗaa gila nde ummi ɗaa haa e ko taw ɗaa doo fof, maa mi rokke kumpital mum, kono wota leel, sabu waktu yahdu am ko-ko ari. Koorka wi’ mate njeyadaa ko e Tagooje kaawniide kodɗe e ndii leydi?

Gorel ngel heɓitii wi’ ko miin mawɗo majje, kala ko nji’ɗaa e ndii doo leydi jeyaa ko e njiimaandi am.

Koorka hebitii wi' ko adii fof njid mi ko janngineede e reentineede gede nuskooje wolla boomooje aadee, sabu won ko humpito am yottaaki.

Gorel ngel wi' mido waawi jannginde ma, reentide ma, kala ko njiddaa, kono ko e dow sardi, so tawii ada waawi yobde mi. Koorka hebitii wi' eey mido yob maa kala ko dum waawi jarde.

Gorel ngel wi' ada waawi rokkude mi ngelooba ndimndu ba kanje dimo, Koorka wi' eey mido waawi, gorel ngel hebitii wi' en pudfiima.

Doon gorel ngel yirltii e dow mbarallu do ngel joodinoo doo ngel sujji laabi tati, ngel tappi tiinde maggel laabi joyi, ngel wi' Koorka abada wota hirndir kikiide ndunngu, Koorka wi' mi jabii. Kono ina haawi Koorka e kala ko ngel gorel, ina golla wonata ko ngaalda. Koorka yobi ngelooba ndimndu ba kanje dimo. Koorka hebitii wi', haa jooni jokku ceerno maa mi rokke ngelooba ngodba ndimndu ba kanje dimo.

Gorel ngel jali ngel tuutti laabi tati, ngel wi' Koorka abada wota yeddu sariya kaaldaado haa hawraa, so yidii tawa ko booydo wolla keso.

Koorka wi' mi jabi, mi wantaa yeddude sariya hasii lelnaama, Koorka jokki e wi'de haa jooni mido ñaagimaa, aan ceerno joom gannde, ganndudo ko wirnii e kaawniide Alla, joom

kaawisaaji yoo a jokku e jannginde mi e wasiyaade mi e dii wasiyaaji maa, di nafoore mum'en gasataa so wonaa ñande neddo maayi. Sabu bure majji bure kanje e kaalis.

Gorel ngel jali ngel sujji, ngel lappi leydi laabi tati, ngel yirlitii e cenge Alla dee kala, doon do ngel joodinoo, haa gite maggel ngaddi gondi mbaanji e wahre maggel raneere, no kosam nder ndunngu.

Wahre ndee ko juutnde haa nde jappoyii e bernde, gorel ngel hebbitii wi', Koorka abada wota sikitaare wolla yaawre wolla nananti naatne e fitina, haa mbadaa heen ko ada nimsa, doon kadi Koorka weltii, kono ko joginoo fof gasii, pulaar noon wi' ko nii potmi hebataa debbo.

Nii woni, Koorka heddii ina jala, ina ndaara ngel gorel Alla e weltaare, sabu kay ina felliti e joomi mum, ngal ganndal, ngal hebi maa meed nde ngal nafoyi dum e nder nguurndam makko.

E nder ñalawma maɓbe tataɓiijo oo, gorel ngel yahi acci doon Koorka. Ndeen yahii haa kikiide, Koorka mijii yoo hirndu yaha, tawde ko kañum gooto heddii doon, kono kadi bernde makko holliti mo wonde won ko aadondiranoo e gorel ceernel ngel, wonde o hirndirtaa kikiide ndunngu, tee oon waktu ko e nder ndunngu wonaa.

Nii woni Koorka ɓami pellital heddaade ɗoon haa weeta, o dawa, kono ko adii nde hiirata woodi tawɓe mo ɗoon, ɓe mbi'dum ar mbadden laawol, o wi'ɓe jooni ko ndunngu kirndol moyɗaani, sabu en nganndaa no toɓo heɓtortoo en e laawol tawa en ngalaa ɗo ɗuwi ɗen, ko ndeen kadi Koorka fillaniiɓe no waddi e godel ngel, haa e ko ɓe ngaadondiri e dow mum, ɓeen ne ngoni e jalde Koorka, eɓe mbi'a dum, aan ko a kaangaado, ko a najɗaado, minen min ɓennii, hade ceerno maa arde fuunta min, wolla najɗoo min.

Koorka waddi e maɓɓe haa tampi woppi, kamɓe kam ɓe mbi', ɓe kaajaaka soodde wolla yeende jawdi haa ɓe keɓa ganndal, ko ɓe njogii koo e ganndal tan yonii ɓe, ɗoon ɓe ɓenni, kono so ɓe nganndiino ɓe mbaɗtaa ko wa'i noon.

Ndeen ɓe ɓennii, nde yahnoo haa ɓooyi mbajjiri ndii hawi yeeso, ndi ɗirɓinii ko leelaani, duule ndiiwondiri pa'i fudnaange, nde yahata haa wona dumunna tawi yiiwoonde fejiima fudnaange.

Nde nanngi saahal e ɓaleeri, Koorka ɗo joodinoo ɗoo ina miiɗoo no dum jogri wa'de, sabu alaa ɗo suudii nduu henndu niɓɓuri ɓaleeru hulɓiniindu, tan haa debbo gooto ari e makko salmini dum, wi' dum ar ɗuwoyo ɗen suudu am.

Koorka ne yedditaaki ummii rewi e debbo, oon ardii dum haa ɓe naatoyi ɗoon e suudu mawndu yaajndu welndu balngol,

endu uuri endu laabi, kono kadi Koorka anndaa wonde ko joom suudu Tagoore nde waddatnoo ndee woni oo debbo.

Doon baylo uditii biifdi mum, henndu sarii e banjeeji dii kala, dum tobii tobo heewngo ndiyam e kartaali kulbiniidi haa do ngo siltoynoo, banjeeji dii fof ngonti weendu wooturu, alaa fof do ndaarataa haa nji'aa leydi, fof ko ndiyam, doon tan worbe bee ndutitii to Koorka ngam ndaardoyde dum yaafuya.

Ndeen be ngartii haa be nji' Koorka heen gooto sujji wi' yaa aan banndiraado teddufo a yidiino wadtude min e laawol, kono faam banii aadee ina tiidi hoore. Kala ko accataa arde e hakkille mum ko duum wadata.

Wadde haa jooni amin ñaago maa yaafuya, kadi mbad taa min e laawol. Koorka hebbitii wi' yoo jam Alla won e mon, nde nimsu don ngartu don e am, jooni njahee on ngontaa yi'de hono ndee tampere, Koorka sujji muɓbi gite ko buri juutde ina hooyinii ellee ñaagotoodo Alla ballal, doon kadi gorel ari e Koorka ngam firtande dum kaawisaaji di yi'noo dii nde arata ndee.

Firo Maale Ji'aade

Ndeen Koorka yi' gorel ngel, Koorka hebtini ngel, Koorka ari battii ngel wi' jam waali ceerno, ngel jaabaaki, Koorka hesditini salminaango makko e wi'de jam waali ceerno joom

gannde e kaawisaaji, fodde laabi jeedidi Koorka ina salmina ngel gorel, ngel nganndu daa tagoodi maggel ko feccere aadee e feccere baajol leydi.

Ko nde yahnoo haa booyi, gorel ngel hebbitii wi', yoo ndenka e moyƴere Alla won e maada ñande kala, ngel wi' ngarmi ko timminde aadi hakkunde men, sabu wonko naamno daa humpito mum, mido ndaardu maa, nde kaalantaa mi kaawisa gadanano mbo kawruno daa.

Doon Koorka wi' ngadii mi yi'de fof ko dooñorgal e ngal wayloo e kala goobu, tee ngal yahrata ko yeeso e caggal, caggal duum nji' mi kadi kullel ngel wa'i kono ndiwri nii, ngel yi'ataa so wonaa jamma, ñalawma ko ngel gumngel.

Doon gorel ngel wadani Koorka maande yoo deyƴu, hanƴkadi faamii fof.

Gorel ngel hebbitii wi' Koorka so tawii ko dooñorgal ngal, dum firti ko neddo dokketeedo sirluuji keewdi, kono alaa heen sirilu mbo o waawi moftude, tee kala mbo o hawri ko be giƴiraabe, ebe mbaawi sirlondirde, kadi ko neddo beldo ƴiiƴam jiitiniido, kono so a ƴeewii a tawat neddaagal makko e ndimaagu makko fof timmaani, kadi kala ko omo wada tawat omo reentii.

So tawii ko solndu yi'ooru jamma yi'ataa ñalawma, duum firti ko neddo ji'owoo goonga saloo, wadta dum fenaande baleere

kurum, mbo yidaa ko laabi, jabataa yahde e lewlewal, joomi mum yidi tan ko-ko jiiibii.

So tawii ko yahre ndee, nde hollata ko neddo baleejo bernde haasidi, mbo yidanaa hay gooto jam, won e sahaaji ina ara e bernde makko warde hoore. Doon kadi tagoore ndee turi hoore ko juuti, nde woni e nayyinde pedeeli mayre e kala do jokkorgal wonnoo e mayre woni e nayyude.

Nde runtii Koorka haa booyi. Nde hucciti e makko, nde wi' so tawii ko weendu mawndu ndu bolle botte baleeje ndeeni nduu, ina holla neddo joom ganndal, joom konngol, mardo besngu mum e njiimaandi ngootiri, moni e maabe fof ina anndi darnde mum e fotde mum, ndiyam dam hollata ko hakkille deeydo.

Sabu omo anndi alaa ko waawi naatde hakkunde besngu makko nguu ko ina bonna ngu.

So tawii ko deebelel ndiyam jarnungel aduna ngel, ngel firti ko neddo jafdo renndee kala ko jogii so heew so famdu, jonaado mbo wonaa haasidi nuundudo tee omo yarlitii rokkirde kala ko o jogii, o heddoo baasdo, jagiido ganndal mbo añanaani ngal hay gooto, kala nde ngardaa ndaartude ganndal e juude makko a hebat, tee maa ngal nafoye e nder nguurndam maada.

Doon kadi Tagoore ndee, ummii darii, nde tolnii e henorde, ngam yeewde so alaa kedtiido ko be ngoni e haalde wolla wadde koo, nde arti nde joodtii nde ferlii, nde hucciti e Koorka.

Tagoore ndee wi' kadi so tawii ko ndawu mbo koyngal gootal, wibjo wooto, kono hay gooto waawaa heftaade wolla jaggude mo, duum firti ko aduna. Kala aadee so fini wi'ata ko maa nannga cadeele pawide e dow hoore mum, kono alaa ko waawi heen gaynude.

Kala heen ko pooldaa, maa ko buri duum feeñanma «Duum wadi Fulbe mbi' aduna ko mbir libotaako.» Paamaa ngal doo ndawuyal ina jogii rewbe nayo be darnde gooto.

Koorka hebbitii wi' duum ne ko firti, rewbe nayo be darnde gooto, Tagoore ndee hebbitii wi' gorko ina haani resde debbo kuuftindindo, dariido e leydi, mbo wonaa mbaaddi, tawa kala do ndaar daa mo, omo tawee toon, so duum ronkii omo haani nawlireede haa timma nayo no sariya addiri.

Yeew gorko ina haani resde debbo jooddo, joom lasli, moyyo jikku, juuldo, ngam reende ndimaagu e neddaagu galle do resaa doo.

Tagoore ndee hebbitii wi', so a resii debbo bondo jikku, bonna innde maa, taya endam maa, seerndu maa e yimbe maa, yidbe maa, sehlaabe e wondiibe maa kala, wonanmaa mette sappo e go'o. Tagoore ndee wadi peedeeli e gine, nde

sukki foofaango mayre ko ɓuri juutde, nde woniri noon nde foofaani, nde hooyinii dow asamaan, ellee ko toon jaabawuuji mayre ngardata, nde juniti hoore e leydi, wi'at ellee won ko nde yi'ata toon, nde heɓbitii nde wi' a yi'i ɓee ina ngoya anndu won bone wadi, ɓeya ina njala anndu won jam mbo ɓe keɓi, sabu ko ɓamtaare maɓɓe ɓe cooyinii, ko hono nii woni aduna ɓee ngoyat tan ɓeya njala.

Koorka anndu lekde diɗi gostondirooje biltugol dee ko duum de kollata.

So tawii ko ngori gontoowo njawndi, wonta ngaari, kadi wonta cumu ladde, suma fof haa wonta ndoondi, dum firti ko neddo baawdo moftude sirilu, kono ñande fof o saakti sirilu oo, bone mawdo kewat ñande mum.

Doon kadi Tagooore ndee sujji e leydi laabi tati e cenɗe Alla nayi dee kala, banɗe fof laabi tati, nde hucciti e Koorka nde wi', so tawii ko mbeeloñ poodondirat koñ ndiyam koñ, firti ko hakkunde Tagooje Alla dee, Aadee'en, Jawdi e kala ko wuuri e leydi, gorel e dewel ko maa ndennda nde ɓesngu waawa heɓeede, toɓo hakkunde leydi e Asamaan huɗo fuda lekde mbilta ɓesna, nguura yimɓe e jawdi dañee, lekde ɗadi mum kawra nder leydi, caayaale majje ngona dow, ngam ɓuuɓri heɓee, ko hono nii mahorii aduna, gorko e debbo ndennda njibina.

Koorka ina ndaara Tagooore ndee tan, ina ndaara nde sabu o ronkii dañde e mayre kaaddi, haa yi' tenba ina ŋaaya e dow mayre, Koorka yidi warde tenba baa, kono Tagooore ndee haɗi ɗum warde tenba ba, nde wi' mi ñaamii gertoode ñaamooje kala ko kawri, gildi, koowobbe, tenke, ñuuyi, mooyu e kala ko de kawri, kono fof kadi ko mooyu watintoo ñaamoyde ɗum e nder ngaska, jamma e ñalawma ina ñaamondira e baawde Alla.

Doon tan nde arti nde deyyi cel, a wi'at ko nde hulnde wolla najnde. Tagooore ndee ɓamti hoore, nde wi' Koorka eden ñaama, eden ñaamtindoo e baawde Alla, kono maa meed nde leydi ñaami'en enen fof.

Doon noon Koorka wi' Tagooore ndee, yaa aan ceernaajo, Holi aan? Hol to ummi ɗaa? Hol no mbi'etedaa? Hol ko mbaawatmi wadande ma? Ngam weltide ma, kono nde salii jaabaade, ende tuggii salamburu yoodndu haawniindu, ndu sifaa waawaa huuɓnude mba'di mum, ndeen ɓe ngonirii noon ko ɓuri juutde.

Tagooore ndee hebitii wi' Koorka a ummiima gila leydi aadeeɓe haa a yottiima leydi Tagooje kaawniide, a taccii keeri e leydeele keewde, haa a yottiima ɗoo e baawde Alla ina gasa nii tawa ko hoddiro addumaa ɗoo.

E laawol, Alla holliima kaawisaaji keewɗi, yontii a seertude e kumpa, lew lewal lomtoo, a yi'ii tagooore nde ko'e jeedidi,

deen ko'e jeedidi ina kolla balde jeedidi gonde e yontere, ende wadi juude capande tati, deen juude ina kolla balde gonde e lewru, koyde sappo e didi dee ina kolla lebbi sappo e didi gondi e nder hitaande.

Tagoore ndee ina haala Koorka ina beydoo haaweede, Koorka yidi haalde kono Tagoore ndee wi'dum cuk, mate wonaa ko nji'daa koo fof ko miin wonnoo, Koorka wi' cel tan ina ndaara ndee Tagoore, nde wi' wonaa ko miin danndu maa e ngori gontudo njawdi, wonti ngaari, wontoyi cumu ladde sumi fof haa rooyti wonti ndoondi.

Paamaa Alla ina jogii kaawniide capande capande de meedaa yi'eede. Asamaanuujii jeedidi, leyde jeedidi de meedaa yi'eede. Tagoore ndee hebbitii kadi wi' Koorka yeew do ngon mi doo ina tammibii kam koyde nayi. Koyngal heen fof won ko hollata.

Koyngal go'abal ngal, ina holla henndu mawndu, heewndu doole. Koyngal didaabal ngal, ina holla jerbugol leydi mawngol. Koyngal tataabal ngal, ina holla ndiyam pusam, keewdam doole. Koyngal nayaabal ngal, ina holla cumu ladde mbonngu heewngu doole, pirtoowu kala ko feewnoo. Nganndaa dee doo gede fof, heen gootal fof ina waawi boomde aduna oo e majal.

Doon tan Koorka luuki cuuji laabi tati hucciti e ndee Tagoore.

Koorka wi', yaa aan ceerno, joom gannde e kaawisaaji, ganndudo ko heewi e mbirniindi banii aadee, Holi aan? Hol no mbi'ete daa? Hol ko ngondaa e Tagooje? Jinne wolla malayka Alla?

A wadonii kam dokke mawde e kaawniide keewde, nde ngar mi e sara ngoo maayo e dee ledde poodondirooje biltugol e oodoo jamma a fodanii kam dokke e gannde haa keewi, Koorka woni e amde Alla e weltaare.

Tagoore ndee hebbitii wi', a naamniima hol miin? Tee a fotii anndude hol miin, sabu ko a dimo baawdo reende sirilu.

Tagoore ndee hebbitii wi' ko miin woni cuudinoodo e punndi mawndi tuma nde kawru daa e doonorgal ngal, mido wonnoo sara maa nde kaaldataa e wil wilndu ndu ñiiye yeeso e caggal, mido badtino maa tuma nde koftaa berem lefol lekki, ngam yardude e beelel tokosel jarnungel aduna oo kala.

Ko miin woni gorko celludo, ñawdo haa banndu mum fof wonti uube e barmande muusde de safroobe ndonkani, ko miin galo mbo hay huunde mankiraaka, ko miin woni miskiino mbo alaa hay ko ñaami so wonaa nde njeloyiimi, ko miin woni gumdo, paho, tak-tako, ko miin woni kuldo reedu, mbo suusaa hay mbeelu mum, ko miin woni jaambaar pooloowo kala jaambaar, ko miin wi'etee Aduna. Doon Tagoore ndee majji e majal yitere nii woni Koorka giddi feerti

gite mum ronki yi'de tagoore nde. Koorka faami tigi ko nii
Aduna haawnorii.

Yoo Wuur Yellitoo Demde Genndiije

Bah Abdullaay Mooliido

Hitaande 2013 / 2014

Tonngoode boggi jamde ko 74 73 82 63 wolla 65 16 22 86
kala jidfo jikkondirde e men ina waawi noddude en, eden
keblanii jabbaade kala gido ngenndiyanke hono men.

Deesaamburu, 2014, Kaay, Maali

Abdoulaye Molido Bah, né en 1971 à Tabale dans la région de Lassaba. En 1980 Monsieur Bah a commencé ses études à Gourel Fally, dans la région de Lassaba, département de Kankossa.

Abdoulaye Molido a travaillé avec les; ONG PADEV, ONG PARO MALI, ARED, FANDEEMA, STOP SAHEL, et voilà aujourd'hui il nous livre un petit roman; un homme et une femme qui ont vécu une vie très difficile, marié à une femme pendant une dizaine d'année, ils étaient très inquiets car n'ayant jusque là, aucune progéniture. Dans ce souci, sa femme l'ordonna de contracter un second mariage, elle s'acquitta même pour contribuer. Au cours dudit mariage l'homme trouva un enfant. L'enfant n'était pas en parfaite santé, il fallait parcourir tous les horizons à la quête des médicaments. Après des années, un miracle de la nature se présente en forme d'humain pour le soigner.

Bah Abdullaay Mooliido jibinaa ko e hitaande 1971 do wi'etee Tabbale e nder leydi moritani, hannde noon o winndanii en doo, ndee doo deftere, nde oodoo gorko e oodoo debbo nguuriino nguurndam cattu dam. Gorko desnoodo debbo fodde duubi sappo, be besnidaani, dum nanngibe ngoy'a mawka sanne. E nder kaan ngoy'a, joom suudu makko yamiri mo yoo o ndaartu debbo godfo waasataa be ndaño dono. Caggal nde gorko oo resi debbo dimmo, be ndañdi cukalel gootel dewel kono ngel sellaano, alaa do be ndgaani e duunde baaba Aadama, kono sellinoyi ngel ko tagoore hulbiniinde iwnde e nder ladde, nde ardi e mum kono ayaawo aadee, nde tawi ngel ko e nder ladde, nde rokki mo lekki, o safrii haa o selli.